

HUA Verzameling Buchel-Booth toegangscode 355 inventarisnummer 458 gedateerd 29 november 1314.

Huwelijkse voorwaarden tussen Gerard van Damasche en Alverade van Langerak.

1. Wy Daniel van der Merwede, ridder, Ghisebrecht, borchgrave tUtrecht, Vrederic
2. Soude van Damasche ende Tideman Grawart doen kont alle denghenen die desen brief sellen sien
3. of horen lesen, dat wy daer over waren ende makemannen waren, van der vergaderinghe
4. des huwelics tuschen Gherarde van Damasche ende Alverade sinen wive die Wouters dochter was
5. van Langherake. In dere maniren dat Gherard voerseyt maken soude ende maken sel van
6. sinen goede Alverade sinen wive vorghenoemt tot hare rechter liiftocht viif ende tvintich
7. pont ghelts iaerlyx suarte tornoyse ende goeden groten coninx tornoysen voer sestien pennighe
8. ende enen goeden hollandschen voer twe penninghen gherekent. Dit dusghedanighen vorwarden
9. waerdat sake dat Gherard voerseyt eer sterve eer Alverade siin wiif sonder wittelike
10. bort van hare so sel Alverade vorghenoemt vtgaen mit sulken goede also si an Gherarde
11. horen man brochte ende mit desen vorghenoemden viif ende tvintich ponden te liiftocht maer
12. waer dat sake dat Gherard vorghenoemt wittelike bort after hem late bi hare so is
13. Alverade voerseyt deser vorgjehoemder liiftocht quite. Voert siint vorwarden waer
14. dat sake dat Alverade vorghenoemt ter storve eer Gherard hoer man sonder wittelike
15. bort van hem so sellen horen erfnamen vtgaen mit sulken goede als si an Gherarde
16. horen man vorghenoemt brochte sonder alre hande archeyt ofte orconde deser dinghe. So
17. heb wi Daniel van der Merwede, ridder, Ghisebrecht van den Goye, borchgrave tUtrecht,
18. Vrederic Soude van Damasche ende Tideman Grawart makemannen vorghenoemde onse seghelle
19. an desen brief gedaen. Ghegheven int jaer ons heren dusent drie hondert ende
20. viertiene in Sinte Andries avont.

Transcriptie ALH